
Kadtong
Babaye Nga
Si Jezabel

ni

Rev. William Marrion Branham

Kadtong Babaye Nga Si Jezabel

ANG PAGBADLONG



Pinadayag 2:20, “Apan ako adunay batok kanimo, nga gitugotan (gipasagdan) mo ang babaye nga si Jezabel, nga nagatawag sa iyang kaugalingon nga usa ka propetisa, sa pagpanudlo ug sa pagpahisalaag sa akong mga ulipon sa paghimo’g pakighilawas, ug sa pagkaon sa mga butang nga hinalad ngadto sa mga larawan.”

Karon uban niining bersekulo gusto kong mopaubos kamo ngadto sa bersekulo 23 ug tan-awa ang kalig-onan sa usa ka dakung kamatuoran nga sa una ko pang ginadala sa inyong pagtagad. “Ug pagapatyon ko sa kamatayon ang iyang mga anak; ug ang tanang mga iglesia mahibalo nga ako Mao ang nagasusi sa mga sulod nga tinguha ug sa mga kasingkasing.” Ako nang gisulti sukad pa nga sa tinuuray adunay duha ka iglesia, bisan pa og nagapakigsulti ang Espiritu ngadto sa duha kanila sa matag kapanahonan, maingon nga daw sa *usa ra* sila. Gisulti kini sa tin-aw dinhi nga adunay *mga iglesia*, ug sa ingon ka klaro nga nagasulti kini nga ang pipila niadtong mga kaiglesiahan sa klaro gayud WALA nakaila nga Siya ang Maong Usa nga nagasusi sa mga sulod nga tinguha ug sa mga kasingkasing. Iyang igapamatuod kanila nga ingon niana gayud kini. Unya karon, mamahimong unsa man kadtong mga iglesia nga wala nakaila niining maong kamatuoran? Siyempre kini ang pundok sa mini nga punoan tungod kay ang matuod nga mga magtotoo siguradong nasayod nga ang paghukom nagasugod sa balay sa Dios, ug sila ingon nga mga mahinadlukon-sa-Dios, ginahukman ang ilang mga kaugalingon aron nga dili na sila mahimong hukman pa.

Karon ngano man nga kining mga kaiglesiahan ginatawag sa Dios nga iyang mga iglesia bisan pa og sila mga mini nga punoan? Ang kamatuoran niini mao nga mga Cristohanon sila. Apan dili sila ang mga Cristohanon sa Espiritu. Mga Cristohanon sila sa unod. Ilang ginadala ang Ngalan sa walay kapuslanan. Marcos 7:7, “Apan kawang lamang

ang ilang pagsimba kanako, gipaka–doktrina sa ilang pagpanudlo ang mga kalagdaan nga hinimo sa tawo.” Apan mga Cristohanon gayud sila kay mamahimong sa unsa pa man sila? Ang Mohamedanhon usa ka Mohamedanhon. Kana mao’y iyang relihiyon bisan pa kung ginaunsa niya pagkinabuhi niini tungod kay siya nagauyon diha sa teyorya sa kung unsa’y ginatudlo sa Koran. Sa ingon niini gihapon nga ang Cristohanon usa ka Cristohanon samtang nga siya nagauyon sa kamatuoran nga si Jesus mao ang Anak sa Dios, natawo pinaagi sa usa ka ulay, gilansang ug namatay ug nabanhaw, nga Siya mao ang Manluluwas sa tawo, ug uban pa. *(Sa tinuod, sa Kapanahonan sa Laodicea magkaaduna kadtong mga nagatawag sa ilang mga kaugalingon nga mga Cristohanon tungod kay uyon sila sa mga maayong gawi ni Jesus, apan sa gihapon ginapabilin sa ilang mga kaugalingon ang katungod sa pagpanghimakak sa Iyang pagka–Dios. Gihimo na kana sa Christian Scientists ingon man usab sa kadaghanan nga nagawali sa Ebanghelyo Pangkatilingban).* Usa siya ka Cristohanon nga sa–ngalan–lamang ug nahisakop sa iglesia. Apan dili siya usa ka MATUOD o Espirituhanong magtotoo. Kana nga matang sa magtotoo maoy usa nga nabautismohan na pasulod sa lawas ni Cristo ug usa na ka kabahin Niya. Apan bisan pa niana, sugo kini sa Dios nga patuboon ang mga bunglayon dungan sa trigo ug nga dili sila pagaibton. Mao kana ang mando sa Dios. Ang ilang adlaw aron pagabugkoson ug pagasunogon nagasingabot na; apan dili pa karon.

Busa nagapakigsulti ang Espiritu ngadto niining nagkasinagol nga pundok. Ngadto sa usa ka bahin Siya nagapasidungog, ug sa pikas bahin usab Siya nagapamadlong. Nagsulti na Siya sa kung unsay husto ngadto sa matuod nga magtotoo. Karon Siya nagapasidaan kung unsay kinahanglan buhaton sa mini nga punoan kung pagamatarungon kini sa atubangan sa Ginoo.

KADTONG BABAYE NGA SI JEZABEL

Ang apostoles nga si Santiago nagpakita kanato sa dalan nga ginalakwan sa sala. Santiago 1:14–15, “Ang tagsatagsa ka tawo matintal sa diha nga madaldal na siya sa iyang kaugalingong kailibgon, ug mahaylo. Unya sa human nga makapanamkon na

ang kailibgon, manganak kini sa sala, ug inigkagulang na sa sala, manganak og kamatayon.” Karon usa kana ka larawan sa eksakto kung unsa gayud ang nagakahitabo sa mga kapanahonan sa iglesia. Maingon nga ang sala nagsugod sa wala gawas sa usa ka pagbati, mao usab ang kamatayon ngadto sa iglesia nga nagsugod sa yano, nga wala kaayo nahimatikdan nga mga buhat sa mga Nicolaita. Gikan sa maong mga buhat nahimo kining usa ka doktrina. Gikan sa maong doktrina gigakus niini ang gahum sa gobyerno ug ang pagpasulod na sa paganismo. Karon sa niining kapanahonan nagaabot kini ngadto sa kaugalingon niining propetisa (magtutudlo) ug gani nagapadayon kini hangtud nga mahikaplagan ang kaugalingon niini nga anaa na sa linaw nga kalayo, kay dinha kon diin eksakto ang kapaingnan niini, sa maong ikaduhang kamatayon.

Karon ang tibuok nga reklamo sa Dios batok niining ikaupat nga kapanahonan anaa makita sa Iyang pagsaway niining propetisa, si Jezabel. Ug aron nga sabton sa eksakto kon nganong Iyang ginaway siya sa ingon niana, kinahanglan nga atong susihon ang Iyang kasaysayan diha sa Biblia ug sa diha nga makita na nato kung unsay Iyang gibuhay kaniadto, mahibaloan nato kung unsa na’y nagakahitabo niining panahona.

Ang una ug ang pinaka–importante nga butang nga atong masayran mahitungod kang Jezabel mao nga siya DILI usa ka anak ni Abraham, ni ang pagpasulod kaniya ngadto sa mga banay sa Israel pareho sa usa ka espirituhanong pagpasulod sama sa iyaha ni Ruth kaniadto, ang Moabihanon. Dili sir. Kining bayhana mao ang anak ni Etbaal, nga hari sa Sidon (Unang Mga Hari 16:31), nga mao ang sacerdote ngadto kang Astarte. Nailog niya ang trono pinaagi sa pagpatay sa nag–una kaniya, si Pheles. Diha pa lang makita na nato nga anak siya sa usa ka mamumuno. (Kini nagapahinumdom gayud kanato bahin kang Cain.) Ug sa paagi nga nahimo siyang kabahin sa Israel dili pinaagi sa gimando sa Dios nga mga espirituhanong pamaagi sa pagpasulod sa Gentil; apan nakasulod siya pinaagi sa PAGPAKIGMINYO kang Ahab, ang hari sa napulo ka banay sa Israel. Karon kining maong paghiusa sama sa ato nang nakita dili

Espirituhanon; politikanhon kadto. Ug busa kining bayhana nga humol na pagsimba sa dios–dios wala gyud ni gamay’ng tinguha nga mamahimong usa ka magsisimba sa Usa ka Matuod nga Dios, kondili miabot siya hinoon nga adunay gipahayag nga mga katuyoan sa pagpahilayo sa Israel sa Ginoo. Karon ang Israel (ang napulo ka banay) nasayod na kung unsaon niadto sa pagsimba sa bulawang mga nati sa vaca, apan dili pa gayud sila nahaylo niadto sa pagsimba sa dios–dios, kay ginasimba niadto ang Dios ug ginatamud ang kasugoan ni Moises. Apan sukad niadtong pagkaminyo ni Ahab ngadto kang Jezabel, milambo sa grabe nang pamaagi ang pagsimba sa dios–dios. Mao na kadto ang panahon nga kining maong babaye nahimo nang usa ka pari nga babaye sulod sa mga templo nga iyang gipangtukod ngadto kang Astarte (Venus) ug kang Baal (ang dios nga adlaw) nga misangko ang Israel sa makatalagmanon nga punto sa iyang kinabuhi.

Sa paghunahuna niini mahimong sugdan nato sa pagtan–aw kung unsa ang ginapahayag sa Espiritu sa Dios niining Kapanahonan sa Tiatira. Ania kini.

Giminyoan ni Ahab si Jezabel ug gihimo niya kini ingon nga usa ka politikanhong maniobra aron lig–onon ang iyang gingharian ug panalipdan kini. Eksaktong mao kana kung unsa ang gibuhat sa iglesia sa pagkaminyo niini sa ilalum ni Constantine. Nagkahiusa silang duha tungod sa politikanhong mga hinungdan, bisan pa nga gipagawas nila kini nga espirituwal. Karon walay makapatoo kanako nga usa ka Cristohanon si Constantine. Usa siya ka pagano nga daw sa may Cristohanon lang nga panggawas. Gipapintalan niya og puti nga mga krus ang mga taming sa mga kasundalohan. Siya mao ang tigpasiugda sa Knights of Columbus. Gibutangan niya og krus ang tore sa Santa Sofia nga maoy nagsugod sa usa ka tradisyon tungod niana.

Plano kadto ni Constantine nga hiusahon ang tanan, ang mga pagano, ang mga sa–ngalan–lang nga mga Cristohanon ug ang matuod nga mga Cristohanon. Ug sa una medyo daw sa molampos siya kay mikuyog man ang matuod nga mga magtotoo aron tan–awon kung madala pa nila balik ang kadtong mga napadpad na palayo sa Pulong. Sa dihang nakita nila nga dili na nila mapahibalik sila ngadto sa

kamatuoran, napugos sila sa pagbulag gikan sa maong politikanhong kapunongan. Unya sa nahimulag na sila, gipangtawag sila og mga erehes ug gipanglutos.

Tugoti akong mosulti dinhi mismo nga aduna na kanato ang pinakamaong butang nga nagakahitabo na mismo karon. Nagkahiusa na tanan ang mga tawo. Nagasulat sila og usa ka Biblia nga moangay sa matag—usa bisan kung usa ka pa ka Judio, Katoliko o Protestante. Adunay ilang kaugalingong Nicene Council apan ginatawag nila kini nga Ecumenical Council. Ug kabalo ba kamo kung kinsa ang ginabatokan niining maong mga organisasyon? Ginabatokan nila ang matuod nga mga Pentecostal. Ang pasabot ko dili ang organisasyon nga gitawag nga Pentecostal. Ang pasabot ko mao kadtong mga Pentecostal tungod nga napuno sila sa Espiritu Santo ug adunay mga ilhanan ug mga gasa sa ilang taliwala tungod kay naglakaw sila diha sa kamatuoran.

Sa dihang giminyoan ni Ahab si Jezabel tungod sa politikanhong mga hinungdan iyang gibaligya ang iyang pagkapanganay. Moapil ka sa usa ka organisasyon ug imo nang ginabaligya ang imong pagkapanganay, igsoon, bisan kung motoo ka pa niini o dili. Ang matag pundok sa Protestante nga migawas sukad ug dayon ningbalik pa gipangbaligya ang ilang pagkapanganay, ug sa dihang ginabaligya mo na ang imong pagkapanganay, sama ka lang kang Esau—mahimo kang modanguyngoy ug maghinulsol kutob sa gusto mo, apan wala na’y mahimo nga kaayohan kini kanimo. Adunay usa lang ka butang ang imong mahimo ug kana maoy, “Gumula kamo kaniya, mga tawo ko, ug undanga ang pag—ambit sa iyang mga sala!” Karon kung wala mo hunahunaa nga husto ako, tubaga lang kining usa ka pangutana. Aduna ba’y buhing tawo nga makahimo sa pagsulti kanako kung unsa nga iglesia o unsa man nga lihok sa Dios nga nagkaaduna na og rebaybal ug nakabangon pa human nga mipaingon kini sa organisasyon ug nahimong denominasyon? Basaha ang inyong mga kasaysayan. Wala ka’y makita’g usa—wala ni usa man.

Takna kadto sa tungang gabii alang sa Israel sa dihang niapil siya sa kalibutan ug gibiyaan ang Espirituhanon tungod sa politikanhon.

Takna kadto sa tungang gabii sa Nicaea sa dihang gibuhat sa iglesia ang mao rang butang. Takna kini sa tungang gabii karon nga nagakahiusa na ang mga kaiglesiahanan.

Karon sa dihang minyo na si Ahab kang Jezabel iyang gitugotan siya sa pagkuha sa kwarta sa gobyerno ug pagtukod sa duha ka dagkung balay sa pagsimba kang Astarte ug Baal. Ang usa nga gitukod para kang Baal ingon ka igo sa kadaku para sudlan sa tibuok Israel ug magsimba didto. Ug sa dihang si Constantine ug ang iglesia kinasal na nanghatag siya og mga gambalay ngadto sa iglesia, ug nangtukod og mga halaran ug mga larawan, ug giorganisa ang kagamhanan sa simbahan nga nagakaporma na niadto.

Sa nakuha na ni Jezabel nga mapaluyohan siya sa gahum sa gobyerno iyang gipamugos ang iyang relihiyon ngadto sa mga tawo ug gipamatay ang mga propeta ug ang mga sacerdote sa Dios. Nagkagrabe kadto nga si Elias, ang mensahero ngadto sa iyang adlaw, nagdahum nga siya na lang usa ang nahibilin; apan aduna pa'y 7000 ang Dios nga wala nangluhod ngadto kang Baal. Ug karon mismo dinha sa taliwala niadtong mga denominasyon sa mga Baptist, mga Methodist, mga Presbyterian, ug uban pa, adunay pipila nga manggawas ug mobalik sa Dios. Gusto kong mahibaloan ninyo nga ako dili, sa karon, ug wala sukad nga mibatok sa mga tawo. Ang denominasyon kini—ang sistema pang-organisasyon ang akong ginabatokan. Kinahanglan kong batokan kini kay nagadumot ang Dios niini.

Karon mohunong lang sa kita dinhi sa makadiyut ug batbaton utro kung unsay atong gipahayag mahitungod sa maong pagsimba didto sa Tiatura. Giingon ko nga nagsimba sila kang Apollo (kinsa mao ang dios nga adlaw) kauban sa emperador. Karon kining si Apollo gitawag nga 'tigpahawa sa kadautan.' Gipahilayo niya ang kadautan sa mga tawo. Iya silang gipanalanginan ug usa kaniadto ka tinuod nga dios ngadto kanila. Siya'y gitooohan nga motudlo sa mga tawo. Gipasabot niya ang mahitungod sa pagsimba, ug ang mga seremonyas sa templo, mga pag-alagad ngadto sa mga dios-dios, ang mahitungod sa mga paghalad ug ang kamatayon ug ang

kinabuhi human sa kamatayon. Ang pamaagi sa ilang pagbuhat niini maoy pinaagi sa usa ka propetisa nga wala sa kaugalingon nga naglingkod sa usa ka lingkuranan nga tulo ang tiil. Sus! Makita ba ninyo kini? Ania kadtong propetisa nga gitawag og Jezabel ug ginatudloan niya ang mga tawo. Ug ang iyang pagtulon-an maoy nagalimbong sa mga alagad sa Dios ug gipapakighilawas sila. Karon ang pagpakighilawas nagkahulogan og 'pagsimba sa dios-dios.' Mao kana kung unsa ang espirituhonong kahulogan niini. Usa kini ka ginadili nga paghiusa. Ang pagkahiusa ni Ahab ug ang pagkahiusa ni Constantine parehong ginadili. Parehong nakahimo ang duha og espirituhonong pagpakighilawas. Ang tanang makihilawason mahiadto sa linaw nga kalayo. Maoy giingon sa Dios.

Unya karon, ang pagtulon-an sa Simbahang Katoliko (babaye ang iglesia, usa kini ka babaye) nagapanghimakak sa Pulong sa Dios. Ang papa nga mao ang literal nga Apollo diha sa modernong bersyon nagtudlo sa mga tawo sa pagpasakop sa ilang mga kaugalingon ngadto sa mga dios-dios. Nahimo na karon ang maong Iglesiang Romano nga usa ka mini nga babayeng propeta ngadto sa mga tawo tungod kay iyang gipanguha ang Pulong sa Ginoo palayo sa mga tawo ug gihatag ang kaugalingon niyang mga pangagpas sa kung unsa ang nagalangkob sa pagpasaylo sa mga sala, kung unsa ang nagadala sa mga panalangin sa Dios; ug ang mga pari napahilayo na kaayo sa tumang pagpahayag nga aduna sila'y kagahum dili lang diha sa kinabuhi kondili usab diha sa kamatayon. Nagapanudlo sila sa kinaugalingon nila nga adunay purgatoryo, apan dili mo kana makita sa Pulong. Nagapanudlo sila nga ang mga pagpangadye ug ang mga pagmisa ug ang kuwarta magapahigawas kanimo sa purgatoryo ug maoy mopasulod ngadto sa langit. Hiwi ang kinatibuk-ang sistema nga maoy gibasihan sa pagtulon-an niini. Wala kini napahimutang sa kasaligang pundasyon sa pinadayag sa Dios sa Iyang Pulong kondili sa nagakatay-og, nagakaunlod, nga balas sa kaugalingon niining mga yawan-ong kabakakan.

Misangpot ang iglesia diretso gikan sa organisasyon ngadto sa denominasyon ug gikan dinhi ngadto na sa bakak nga pagtulon-an.

Husto kana. Dili nagatoo ang mga Romano Katoliko nga anaa ang Dios sa Iyang Pulong. Wala sir. Kung nagtoo pa sila gikinahanglan nilang maghinulsol ug mobalik, apan ilang ginaingon nga anaa ang Dios sa Iyang Iglesia. Pagahimoon niana ang Biblia nga maoy kasaysayan sa Simbahang Katoliko. Dili ingon niana. Tan-awa kung unsay ilang gibuhad sa Cristohanong Bautismo pa lang. Ilang gipahiwi kini ingon nga Cristohanong Bautismo ug gihimo kini nga usa ka iya sa pagano nga pang-titulo. Estoryahan ko kamo mahitungod sa akong nasinati uban sa usa ka Katoliko nga pari. Nahimong Katoliko ang usa ka batang babaye nga nabautismohan ko, mao nga gustong makighinabi ang maong pari kanako bahin kaniya. Nangutana siya kung unsay matang sa bautismo nga nagkaaduna ang maong batang babaye. Giingnan ko siya nga ako siyang gibautismohan sa Cristohanong Bautismo nga mao lang ang anaa nga matang sa akong pagkasayod. Ako siyang gilubong diha sa tubig sa Ngalan ni Ginoong Jesus Cristo. Gisultihan ako sa maong pari nga usa ka panahon kuno kaniadto gibuhad kana sa Simbahang Katoliko. Gipangutana ko siya dayon kung kanus-a gibuhad kadto sa Simbahang Katoliko, kay nabasa ko man ang ilang kasaysayan ug dili ko makita ang Iyang giingon. Iya akong giingnan nga makita kadto sa Biblia, ug nga giorganisa ni Jesus ang Simbahang Katoliko. Gipangutana ko siya kung gihunahuna ba niya nga si Pedro mao gayud ang unang papa. Pinaklaro niya sa pag-ingon nga si Pedro gayud. Gipangutana ko siya kung gihimo ba ang mga misa diha sa Latin aron sa pagpaniguro nga kadto wala'y sayup ug dili na gayud mausab. Nagsulti siya nga tinuod kana. Gisultihan ko siya nga naghunahuna ako nga nahisalaag na sila'g maayo sa kung unsay anaa kanila kaniadto sa sinugdanan. Gipahibalo ko siya nga kung nagtoo gayud ang Simbahang Katoliko sa Basahon sa Mga Buhat, nan usa ako ka pang-kinaraang Katoliko. Giingnan niya ako nga ang Biblia mao ang rekord sa Simbahang Katoliko ug nga ang Dios anaa sa maong Iglesia. Wala ako miuyon kaniya kay ang Dios anaa sa Iyang Pulong. Pasagdi ang Dios nga hipalgan nga maminatud-on apan ang tanan nga tawo bakakon. Kung magataktak ka o magadugang ngadto nianang Basahona, nagsaad ang Dios nga Iyang pagadugangan ang

mga hampak sa kadtong mga nagadugang ug pagataktakon ang iyang bahin sa Basahon sa Kinabuhi kung mangahas sila sa pagtaktak gikan Niini. Pinadayag 22:18, 19.

Ipakita ko lang kaninyo kung giunsa pagtoo sa Simbahang Romano Katoliko nga ang Dios anaa sa iglesia imbis sa Pulong. Ania ang usa ka kinuha sa diary ni Papa Juan ika-23. “Ang kasinatian ko sulod niining tulo ka tuig ingon nga Papa, sukad ‘diha sa kahadlok ug pagkurog’ akong gidawat kining pagpangalagad sa putling pagkamasinugtanon *ngadto sa Kabubut-on sa Ginoo, nga gipahayag kanako pinaagi sa Sacred College of Cardinals diha sa usa ka sekretong panagtigum*, nagasaksi ngadto niining sanglitanan ug maoy usa ka nakapaaghat ug malungtarong hinungdan alang kanako nga magmatinuuron niini; bug-os nga pagsalig sa Dios, diha sa tanan nga may kalabutan sa karong panahon, ug hingpit nga kadaitan bahin sa umalabot.” Nagapamahayag kining maong papa nga nagsulti ang Dios pinaagi sa iglesia nga nagapadayag sa Iyang kabubut-on. Daw sa unsa ka bakak. Anaa ang Dios sa Iyang Pulong ug nagasulti pinaagi sa Iyang Pulong nga maoy nagapadayag sa Iyang kabubut-on. Nag-ingon usab siya nga iyang gipahimutang ang bug-os niyang pagsalig ngadto sa pulong sa mga tawo ug gituman kini sa kadaitan tungod niini. Maanindot kaayo kini paminawon apan bakak kini kaayo. Sama gayud sa maong pagtuis didto sa Tanaman sa Eden.

Karon atong paklion dinhi sa Pinadayag 17 ug makita kining babaye, ang iglesia, kinsay nagkinabuhi diha sa bakak nga mga pagpropesiya ug dili sa Pulong sa Dios. Diha sa bersekulo 1 ginatawag siya sa Dios nga ang dakung bigaon. Nganong usa man siya ka bigaon? Tungod kay anaa siya sa pagsimba sa dios-dios. Nalimbongan niya ang mga tawo ngadto sa mao gihapong butang. Unsa man ang tambal sa pagsimba sa dios-dios? Ang Pulong sa Dios. Mao nga usa ka bigaon kining maong babaye tungod kay iyang gibiyaan ang Pulong. Dinha siya naglingkod ibabaw sa daghang mga tubig, nga nagkahulogan og daghang mga tawo. Siguradong kini gayud ang mini nga iglesia tungod kay gamay ra man ang iglesia sa Dios—diyutay ra ang nakatultol niini.

Himatikdi kung unsa siya sa mga mata sa Dios, bisan pa kung unsa siya ka maanindot tan-awon ngadto sa mga tawo ug kung unsa pa siya ka makatarunganon paminawon. Mangil-ad siya nga hubog sa iyang mga pagpakighilawas. Karon hubog siya sa dugo sa mga martir. Sama gayud kang Jezabel nga nagpamatay sa mga propeta ug mga sacerdote ug gipamatay ang katawhan sa Dios nga dili moyukbo ug mosimba kang Baal. Ug mao kana sa eksakto kung unsa'y gibuhad sa Katolikong Simbahan. Ilang gipamatay kadtong mga dili moyukbo sa paghari sa papa. Kadtong mga mas gipili ang Pulong sa Dios imbis ang mga pulong sa tawo gipangpatay, kasagaran pinaagi sa mapintas nga mga pamaagi. Apan kini nga iglesia nga nakigpatigayon pinaagi sa kamatayon patay na mismo ug wala nasayod niini. Wala'y kinabuhi diha kaniya ug walay mga ilhanan nga sukad minunot kaniya.

PANAHAON SA PAGHINULSOL

Pinadayag 2:21, "Ug gihatagan ko siya'g panahon sa paghinulsol sa iyang mga pagpakighilawas; apan wala siya maghinulsol." Nakahibalo ba mo nga kining iglesiaha sa tinuoray mas dautan pa kang Ahab? Nakahibalo ba mo nga naghinulsol si Ahab sa makadiyut ug naglakaw nga malomo sa atubangan sa Dios? Dili mo masulti kana mahitungod sa Romano Katolikong Simbahan. Dili sir. Wala gayud siya maghinulsol sukad kondili nagpatuyang pa nga gipanglaglag ang bisan unsa ug ang tanan nga nagtinguha nga tabangan siya sa paghinulsol. Mao kana ang kasaysayan. Karon ang Dios padayon nga nagpatungha og dili lang mga mensahero ngadto sa matag kapanahonan kondili gipatungha Niya ang pipila ka talagsaong mga mag-aabag alang niadtong mga mensahero. Naghatag Siya sa matag kapanahonan og pipila ka talagsaong mga lalaki sa Dios ug gihimo nila ang tanan nilang mahimo sa pagpahibalik sa iglesia ngadto sa Dios. Gihatagan gayud siya sa Dios og kahigayonan ug tabang aron maghinulsol. Naghinulsol ba gayud siya ug nagpakita nga gihimo niya pinaagi sa iyang mga bunga? Dili sir. Wala gayud niya sukad ug dili niya gayud buhaton. Hubog na siya. Nawad-an na siya sa iyang mga igbabati sa mga butang espirituhanon.

Karon ayaw paglibog ug nga sugdan paghunahuna nga ang Simbahan sa Roma naghinulsol na sa iyang pagpamatay sa mga balaan tungod nga nagapaningkamot na siya sa pagpakighiusa sa mga Protestante pinaagi sa pagpalinya sa iyang mga kredo sa Mga Kredo pang-Protestante. Wala gayud siya ni sa makausa nangayo'g pasaylo ug nagsulti man nga sayup siya niadto sa iyang halapad nga mga pagpamatay. Ug nga dili niya kana buhaton usab. Ug bisan unsa pa siya ka daw sa malomo ug maloloy-on niining partikular nga panahon, magabangon siya sa gihapon aron magapamatay, kay ang pagpamatay anaa na sa iyang dautan ug wala'y paghinulsol nga kasingkasing.

GIHUKOM ANG SILOT SA MAONG BIGAON

Pinadayag 2:22-23, “Ania karon ako siyang ibundak diha sa usa ka higdaana'g masakiton, ug sila nga nanagpanapaw uban kaniya akong idan-ok ngadto sa dakung kasakitan, gawas kung ilang hinulsolan ang ilang mga binuhatan. Ug pagapatyon ko sa kamatayon ang iyang mga anak; ug ang tanang mga iglesia mahibalo nga Ako Mao Ang nagasusi sa mga sulod nga tinguha ug sa mga kasingkasing, ug pagahatagan ko ang tagsatagsa kaninyo sumala sa inyong mga buhat.”

Unsa? May mga anak kining babaye? Ug siya usa ka bigaon? Kung ingon niana nga nagkaaduna siya og mga anak sa iyang mga pagpakighilawas nan kinahanglan siyang pagasunogon sa kalayo sama sa giingon na sa Pulong. Eksaktong tinuod gyud kana. Mao kana ang iyang katapusan kay pagasunogon siya sa kalayo. Sa linaw nga kalayo ang iyang katapusan. Apan hunong sa ug hunahunaa kining maong mga kaanakan sa makadiyut. Usa ka babaye ang maong kinsay gigikanan sa mga anak. Klaro nga kining babaye adunay mga anak nga migikan kaniya apan gibuhat nila ang mao gihapong butang nga iyang gibuhat. Pakitai ko og usa ka iglesia sukad nga migawas sa organisasyon nga dili mibalik mismo ngadto niini. Wala gyu'y usa. Wala ni usa. Ninggawas ang mga Lutheran ug dayon nag-organisa balik ug kakonsabo na sila karon sa niining ekumenikong kalihokan. Ninggawas ang mga Methodist ug dayon nag-organisa balik. Ninggawas ang mga Pentecostal ug dayon nag-organisa balik. Aduna pa'y usa

nga mogawas, ug dalaygon ang Dios nga sila dili moorganisa balik tungod kay nasayod sila sa kamatuoran. Kana nga pundok mao ang mamahimong pangasaw-onon sa ulahing panahon.

Karon giingon dinhi nga adunay mga anak kining maong bigaon. Mga unsa man kini sila karon? Sila ang mga anak nga babaye, kay sila'y mga iglesia sama lang kaniya. Ania karon ang makapaikag nga punto. Adunay usa ka anak nga babaye si Jezabel ug si Ahab. Kana nga anak naminyo kang Joram nga anak nga lalaki ni Josaphat ug diha sa Ikaduhang Basahon sa Mga Hari 8:16 nagaingon kini nga “si Joram naglakat sa dalan sa iyang ugangan nga lalaki.” Mipaingon siya diretso sa pagsimba sa dios-dios pinaagi niining maong pagpakigminyo. Gihatud niya ang Juda nga mahinadlukon-sa-Dios ug nagasimba sa Dios paingon ngadto sa pagsimba sa dios-dios. Mao kana ang eksaktong gibuhad niining tanang mga kaanakang iglesia, sama sa gisulti ko na kaninyo. Nagasugod sila diha sa kamatuoran ug makigminyo ngadto sa organisasyon ug biyaan ang Pulong tungod sa tradisyon, sa mga kredo ug uban pa. Karon tugoti ako nga mapasabot kini. Diha sa Mga Hebreohanon 13:7 nagaingon kini, “Hinumdumi ninyo ang mga nagamando kaninyo mga tawo nga nanagsulti kaninyo sa Pulong sa Dios.” Ang Pulong ang maong nagamando kanato, dili ang tawo. Karon ang usa ka lalaki ingon nga bana mao ang ulo sa babaye. Siya ang nagamando kaniya. Apan ang iglesia babaye, usab, ug ang magmamando kaniya mao ang Pulong. Si Jesus mao ang Pulong. Kung ginasalikway niya ang Pulong ug nagadawat sa bisan unsa pa man nga kapangulohan usa siya ka mananapaw. Karon pagngalan kanako og usa ka iglesia nga wala pa mibiya sa Pulong tungod sa mga tradisyon ug mga kredo. Mga mananapaw silang tanan-kung unsa ang inahan, mao usab ang anak nga babaye.

Unsa man ang mamahimong silot sa maong bigaon ug sa iyang mga anak nga babaye? Bueno, mamahimong duha ka pilo kini. Una nag-ingon Siya, “Ibundak ko siya diha sa higdaana'g masakiton.” Sumala sa kaulahiing bahin sa bersekulo 22 mamahimong usa kini ka higdaanan sa kasakitan, o ang dakung kasakitan. Mao kana ang eksaktong giingon ni Jesus sa Mateo 25:1-13. Adunay napulo ka mga

dalagang ulay. Ang lima maalam ug ang lima usab buangbuang. Ang lima nga maalam adunay lana (ang Balaang Espiritu) apan wala ang laing lima. Sa dihang ang singgit nilanog, “Ania karon ang Pamanhonon nagaanhi,” ang maong lima ka buangbuang gikinahanglan pang modagan sa pagpangita og lana samtang ang lima ka maalam nga mga dalagang ulay mingsulod na ngadto sa kombira sa kasal. Ang lima nga nahibilin sa gawas gibiyaan ngadto na sa dakung kasakitan. Mao kana ang mahitabo sa tanan nga dili makauban sa pagsakgaw. Mao kana kung unsay mahitabo sa maong bigaon ug sa iyang mga anak nga babaye. Ikaduha, nagaingon kini nga iya silang pagapatyon sa kamatayon o sama sa ginaingon sa literal nga paghubad, “Pasagdi silang mamatay pinaagi sa kamatayon.” Usa kini ka talagsaong panulihon. Mahimo natong ingnon, “pasagding mamatay ang usa ka tawo pinaagi sa pagbitay, o pinaagi sa pagkuryenti o unsa pa man nga pamaagi.” Apan nagaingon kini, “Pasagding mamatay sila pinaagi sa kamatayon.” Kamatayon mismo ang hinungdan sa ilang kamatayon. Karon gusto kong makita ninyo kini sa klaro busa gamiton ko ang atong paghulagway usab mahitungod sa anak nga babaye ni Jezabel nga nakigminyo pasulod sa balay sa Juda ug sa ingon niana ginahatud kini ngadto sa pagsimba sa dios–dios ug nahimong hinungdan nga dalhon sa Dios ang Juda ngadto sa kamatayon. Mao kana kung unsa ang gibuhad ni Balaam, usab. Busa ania si Jezabel kauban sa iyang paganismo. Ug didto usab ang Juda nga sa husto nagasimba sa Dios ug nagkinabuhi ilalum sa Pulong. Busa gipaminyo ni Jezabel ang iyang anak nga babaye ngadto kang Joram. Dihadiha mismo nga pagkahitabo niadto, nahimong hinungdan si Joram nga mahimong magsisimba na sa dios–dios ang mga tawo. Dihadiha mismong pagkahitabo niadtong pagkasal patay na ang Juda. Misulod ang kamatayong espirituhanon. Dihadiha mismong pagkaorganisa sa unang iglesia sa Roma, namatay kini. Dihadiha mismo nga nag–organisa ang mga Lutheran, misulod ang kamatayon ug namatay sila. Ulahing miabot ang mga Pentecostal ug nag–organisa sila. Mibiya ang Espiritu, bisan pa nga dili sila motoo niini. Apan mibiya gayud Siya. Nagdala’g kamatayon kadtong maong pagpakigminyo. Dayon miabot ang kahayag sa Pagkausa sa Dios. Nag–organisa sila ug namatay sila

usab. Dayon human nga mikanaug ang kalayo sa Dios didto sa Ohio River sa 1933 mikaylap sa kalibutan ang rebaybal sa pagpang-ayo, apan dili gyud kini migikan sa bisan unsang organisasyon. Migawas ang Dios sa mga pundok sa Pentecostal, gawas sa mga organisasyon, ug kung unsa man ang Iyang pagabuhaton sa umalabot mamahimong sa gawas sa organisasyon, usab. Dili mahimong mamuhat ang Dios pinaagi sa patay na. Makapamuhat lang Siya pinaagi sa BUHI nga mga miyembro. Kadtong buhi nga mga miyembro atua sa gawas sa Babilonia.

Busa nakita n'yo na, ang "Kamatayon" o "Organisasyon" miabot, ug namatay ang iglesia, o sa pagpaklaro pa niini nahimong usa ka pumupuyo ang kamatayon kon diin sa wala pa kini KINABUHI lamang ang naghari. Maingon nga ang orihinal nga Eba nagdala'g kamatayon ngadto sa tawo mao usab karon nagdala'g kamatayon ang organisasyon, kay ang organisasyon mao ang bunga sa maong duha ka mga magdadaut, ang Nicolaitanismo ug ang Balaamismo, nga gipakaylap sa propetisa nga si Jezabel. Karon gisunog na unta si Eba kauban ang maong bitin tungod sa ilang makalilisang nga binuhatan. Apan nagpatunga si Adan, nga gisakmit si Eba dayon ngadto sa iyang kaugalingon aron nga maluwas kini. Apan sa diha nga kining relihiyon ni Satanas naagian na ang tibuok gitas-on niining mga kapanahonan, wala na'y usa nga mahimong magpatunga pa, ug pagasunogon na siya kauban sa iyang maglilimbong, kay ang bigaon ug ang iyang mga anak ug ang anticristo ug si Satanas ilang tanan mahikaplagan ang ilang mga lugar didto sa linaw nga kalayo.

Dinhi mismo maunahan ko na ang akong kaugalingon ug angay ko tingaling itagana kini alang sa mensahe mahitungod sa ulahing kapanahonan, apan daw sa husto lang nga iapil kini karon tungod kay may klarong kahilambigitan kini sa organisasyon ug kung unsa ang magakahitabo pinaagi niini. Ug gusto kong ipasidaan kaninyo. Pinadayag 13:1-8, "Ug mitindog ako sa baybayon sa dagat, ug nakita ko ang usa ka mapintas nga mananap nga migimaw sa dagat, nga adunay pito ka mga ulo ug napulo ka mga sungay, ug sa iyang mga sungay may napulo ka mga purongpurong, ug sa iyang mga ulo

ang ngalan sa pasipala. Ug ang mapintas nga mananap nga akong hingkit-an sama sa usa ka leopardo, ug ang iyang mga tiil ingon sa mga tiil sa usa ka oso, ug ang iyang baba ingon sa baba sa leon; ug kaniya gihatag sa dragon ang iyang gahum, ug ang iyang trono ug dakung pagbulot-an. Ug nakita ko ang usa sa iyang mga ulo ingon sa nasamaran nga ikamatay; ug ang iyang samad nga ikamatay naayo na: ug ang tibuok nga yuta nanghibulong nga nagasunod sa mapintas nga mananap. Ug gisimba nila ang dragon nga mihatag sa maoy dakung pagbulot-an ngadto sa mapintas nga mananap: ug gisimba nila ang mapintas nga mananap, nga nagaingon, Kinsa ba'y makasama sa mapintas nga mananap? Kinsa ang arang makiggubat kaniya? Ug gihatagan siya og baba nga nagasulti sa mga butang nga dagku ug mga pasipala; ug gihatagan siya og pagbulot-an sa pagbuhat sulod sa kap-atan ug duha ka bulan. Ug gibungat niya ang iyang baba sa mga pasipala batok sa Dios, aron pasipalaan ang Iyang Ngalan, ug ang Iyang tabernakulo, ug bisan ang nagapuyo sa langit. Ug gihatag kaniya ang pagpakiggubat batok sa mga balaan, ug pagdaug kanila: ug gihatagan usab siya og pagbulot-an ibabaw sa tanang banay og katawohan, ug mga sinultihan, ug kanasuran. Ug pagasimbahon siya sa tanan nga nagapuyo sa yuta, kinsang mga ngalan wala ikasulat sa Basahon sa Kinabuhi nga iya sa gipatay nga Cordero sukad sa pagtukod sa kalibutan. Kung kinsa ang may igdulungog, magpatalinghug. Kung kinsa ang magapamihag sa pagpamihag moadto siya: kung kinsa ang magpatay pinaagi sa hinagiban kinahanglan nga pagapatyon siya pinaagi sa hinagiban. Ania dinhi ang pagpailub ug pagtoo sa mga balaan. Ug nakita ko ang lain na usab nga mapintas nga mananap nga nagagimaw sa yuta; ug siya may duha ka mga sungay sama sa usa ka cordero, ug nagsulti siya ingon sa usa ka dragon. Ug nagabuot siya sa tanang pagbulot-an sa nahaunang mapintas nga mananap sa iyang atubangan, ug ginapasimba niya ang yuta ug ang mga nagapuyo niini sa nahaunang mananap, kinsang samad nga ikamatay naayo na. Ug nagabuhat siya og dagkung mga ilhanan, lakip ang kalayo sa langit ginapakanaug niya sa yuta sa atubangan sa mga tawo. Ug iyang ginalimbongan sila nga nagapuyo sa yuta pinaagi sa mga ilhanan nga gihatag kaniya sa

pagbuhat sa atubangan sa mapintas nga mananap; nga nagaingon sa mga nagapuyo sa yuta, nga managbuhat sila og usa ka larawan alang sa mapintas nga mananap, nga may samad sa hinagiban, ug nabuhi. Ug gihatag kaniya ang paghatag sa pagginhawa sa larawan sa mapintas nga mananap, aron nga makasulti ang larawan sa mapintas nga mananap, ug makahimo sa pagpatay usab sa kapid-an nga dili magsimba sa larawan sa mapintas nga mananap. Ug gibuhat niya nga ang tanan, ang mga timawa ug kadagkuan, mga dato ug mga kabus, ang may kagawasan ug mga ulipon, mapatikan ang ilang mga kamot nga too, kun ang ilang mga agtang: Ug nga walay bisan kinsa nga arang makapalit kun makabaligya, gawas lamang ang may patik, bisan ang ngalan sa mapintas nga mananap, kun ang numero sa iyang ngalan. Dinhi ania ang kaalam. Ang may salabutan isipon niya ang numero sa mapintas nga mananap: kay kini mao ang numero sa tawo; ug ang iyang numero unom ka gatus ug kan-uman ug unom.”

Kini nga kapitulo nagapakita sa gahum sa Simbahang Romano Katoliko ug kung unsay iyang pagabuhaton pinaagi sa organisasyon. Hinumdumi nga kini ang mini nga punoan. Pasagdi nga ipahayag niini ang Ngalan sa Ginoo, ginahimo lang kini sa ingon niini diha sa pagpamakak. Ang kapangulohan niini dili iya sa Ginoo kondili iya ni Satanas. Sa kaulahian nagahinapos kini ingon nga bug-os nang maila nga kaabin sa mapintas nga mananap. Ang bigaon nga nagasakay diha sa mapula nga mananap tataw nga nagapakita nga ang iyang gahum mao ang dios sa kapintas (si Satanas) ug dili sa atong Dios, ang Ginoong Jesus Cristo.

Diha sa bersekulo 17, pinatataw nga nagapakita kini nga maangkon niya ang bug-os nga pagkontrola sa patigayon sa kalibutan, kay wala’y tawo nga makahimo sa pagbaligya ug sa pagpalit gawas kaniya. Gipamatud-an kini diha sa Pinadayag 18:9-17 nga nagapakita sa iyang kahilambigitan sa mga hari, mga prinsipe, mga magpapatigayon, kinsa ang tanan kanila may kahilambigitan sa Roma ug mga patigayon.

Diha sa Pinadayag 13:14, atong masayran nga ginapakuyanap sa mapintas nga mananap ang iyang impluwensiya pinaagi sa larawan nga gitukod alang kaniya. Ang maong gihimo nga larawan mao ang

usa ka konsilyong ekumeniko sa tibuok kalibutan, kon diin ang tanan nga organisadong mga iglesia magakahiusa na kauban sa mga Romano Katoliko (ila nang ginabuhat kana bisan karon.) Posible kaayo nga kining pagkahiusa mahitabo aron nga pakgamong ang gahum sa komunismo. Apan tungod nga gipatungha ang komunismo sama kang Nabucodonosor aron sunogon ang unod sa maong bigaon, ang Roma mapukan ug malumpag. Timan-i nga bisan asa man miadto ang maong iglesiang Romano, misunod ang komunismo. Mamaingon-ana gayud kini. Ug tugoti kong ipasidaan kaninyo karon, ayaw gayud paghunahuna nga komunismo lang ang inyong kaaway. Dili sir. Ang Katolikong Iglesia usab, ug ilabina gayud.

Karon atong basahon ang Pinadayag 13:1-4, ug itandi kini sa Pinadayag 12:1-5. Pinadayag 13:1-4, "Ug mitindog ako sa baybayon sa dagat, ug nakita ko ang usa ka mapintas nga mananap nga migimaw sa dagat, nga adunay pito ka mga ulo ug napulo ka mga sungay, ug sa iyang mga sungay may napulo ka mga purongpurong, ug sa iyang mga ulo ang ngalan sa pasipala. Ug ang mapintas nga mananap nga akong hingkit-an sama sa usa ka leopardo, ug ang iyang mga tiil ingon sa mga tiil sa usa ka oso, ug ang iyang baba ingon sa baba sa leon; ug kaniya gihatag sa dragon ang iyang gahum, ug ang iyang trono ug ang dakung pagbulot-an. Ug nakita ko ang usa sa iyang mga ulo ingon sa nasamaran nga ikamatay; ug ang iyang samad nga ikamatay naayo na: ug ang tibuok nga yuta nanghibulong nga nagasunod sa mapintas nga mananap. Ug gisimba nila ang dragon nga mihatag sa dakung pagbulot-an ngadto sa mapintas nga mananap: ug gisimba nila ang mapintas nga mananap, nga nagaingon, Kinsa ba'y makasama sa mapintas nga mananap? Kinsa ang arang makiggubat kaniya?" Pinadayag 12:1-5, "Ug sa kalangitan dihay nagpakita nga usa ka dakung tilimad-on; usa ka babaye nga nagbisti'g adlaw, ug ang bulan sa ilalum sa iyang mga tiil, ug sa iyang ulo dihay usa ka purongpurong nga mga bitoon nga napulo'g duha ka buok: Ug siya mabdos ug nagsiyagit, sa mga kasakit sa pag-anak, ug ginasakitan siya sa pag-anak. Ug dihay usa pa ka laing tilimad-on nga nagpakita sa kalangitan; ug ania karon

ang usa ka dakung dragon nga mapula, nga may pito ka mga ulo ug napulo ka mga sungay, ug may pito ka mga purongpurong sa iyang mga ulo. Ug ang iyang ikog nagaguyod sa ikatulo ka bahin sa mga bitoon sa langit, ug sila gilabog niini ngadto sa yuta: ug ang dragon mibarog sa atubangan sa babaye nga hapit na manganak, aron iyang lamyon ang bata inigkahimugso na niini. Ug ang babaye nag-anak sa usa ka anak nga lalaki, nga mao ang magahari sa tanang kanasuran pinaagi sa olisi nga puthaw: ug ang iyang bata gidala ngadto sa Dios, ug sa iyang trono.” Si Satanas ug ang iyang Satanasnon nga relihiyon anaa niining duha ka mapintas nga mga mananap. Diha sa Pinadayag 14, ang maong mapintas nga mananap nga nasamaran nga ikamatay apan nabuhi pag-usab mao ang imperyo sa paganong Roma nga napukan sa mga pag-ataki sa mga barbaro ug tungod niana nawad-an siya sa iyang pang-kalibutan nga gahum. Apan iyang nabawi kini pag-usab diha sa papanhong Roma. Nakita ba ninyo kini? Ang maong nasud nga naghari pinaagi sa pagdugmok na sa tanan ug nga nahimong pinakakusgan nga imperyo nga nailhan, sa kaulahiay nasamaran nga ikamatay. Nawala sa pisikal ang iyang gahum kung paghisgotan ang pagkontrol pinaagi sa mga kasundalohan ug uban pa. Apan nabuhi siya pag-usab sa ilalum ni Constantine, kay ang papanhong Roma mituhop na sa tibuok kalibutan, ug bug-os gayud ang iyang gahum. Nagagamit siya’g mga hari ug mga magpapatigayon ug sa iyang makapatay nga relihiyoso ug pinansiyal nga kusog nagapangagamhanan siya ingon nga diosa niining kapanahonan karon. Siya usab ang dragon nga mitindog nga nagahulat aron tukbon ang maong lalaki nga bata. Gipaninguhaan ni Herod nga patyon ang Ginoong Jesus ug napakyas siya. Sa ulahi gilansang si Jesus sa krus sa Romanong kasundalohan, apan karon mikayab na ngadto sa trono.

Karon subay sa kung unsay bag-o ko lang giingon, hinumdumi balik ang panan-awon ni Daniel. Ang ulahi nga bahin sa maong larawan, ang ulahing kagamhanan sa kalibutan atua sa mga tiil. Kadto ang puthaw ug yutang kolonon. Makita ninyo nga ang puthaw mao ang Imperyong Romano. Apan dili na kini karon solido nga puthaw. Nasagolan na kini og yutang kolonon. Apan anaa kini sa gihapon dinha

ug ang mao rang nagapadagan sa mga buluhaton pang–kalibutan diha sa demokratikong mga kanasuran ug sa kadtong mga hilabihan kamalupigon. Anaa na kining Romanhong iglesia sa matag nasud. Nakasagol na kini sa tanan niini.

Tugoting hatagan ko kamo og usa ka mahinungdanong butang bahin sa maong puthaw ug yutang kolonon. Hinumdumi nga sa dihang gidukdok ni Khrushchev ang iyang sapatos diha sa desk sa U.N.? Bueno, adunay lima niadto ka mga nasud nga gikan sa sidlakan ug lima ang gikan sa kasadpan. Namulong niadto si Khrushchev para sa Sidlakan ug si Pangulong Eisenhower usab ang para sa Kasadpan. Sa pinulongang Ruso, ang Khrushchev maoy yutang kolonon ug ang Eisenhower nagkahulogan usab og puthaw. Ang maong duha ka nangunang mga pangulo, ang duha ka dagkung kumagko sa mga tiil nga puthaw og yutang kolonon, nga nagkaabay na. Ania na kita sa katapusan sa tanan niini.

Diha sa bersekulo 4, nagapangutana kini, “Kinsa man ang arang makiggubat sa mapintas nga mananap?” Karon aduna sa pagkakaran og pipila ka bantugang mga ngalan sa kalibutan. May pipila ka gamhanang mga nasud, apan ang Roma mismo karon ang nagadikta. Ang papa mao ang nagakontrola. Ug magadaku pa ang iyang gahum. Walay arang nga makiggubat kaniya.

Bersekulo 6, “Ug gibungat niya ang iyang baba sa mga pasipala.” (Gipaka–doctrina sa ilang pagpanudlo ang mga kalagdaan nga hinimo sa tawo, mga gahi’g ulo, mga hambugiro, mahigugmaon sa mga kalingawan, nga adunay dagway sa pagkadiosnon ug nagapanghimakak sa gahum niini.) Iyang gipasipalaan ang Ngalan sa Dios—ginapulihan kana nga Ngalan ngadto sa mga titulo ug ginabalibaran ang pagbuhat niini sa laing paagi.

Bersekulo 7, “Ug gihatag kaniya ang pagpakiggubat batok sa mga balaan.” Paglutos—kamatayon ngadto sa matuod nga magtotoo ug tanan niini sa Ngalan sa Ginoo aron nga mapasipalaan ang Ngalan sa Dios, maingon kini sa gihapon sa Rusya, tungod sa kung unsa ang gihimo sa Katolikong relihiyon didto.

Bersekulo 8, “Ug ang tanan nga nagapuyo sa yuta (ang tanan kinsang mga ngalan wala ikasulat sa Basahon sa Kinabuhi nga iya sa gipatay nga Cordero sukad sa pagtukod sa kalibutan) magasimba kaniya.”

Salamat sa Dios nga ang carnero dili gayud mosimba kaniya. Ang tanan na malimbongan gawas lamang sa mga pinaka pinili. Apan dili sila malimbongan. Tungod kay nagapatalinghug sila sa tingog sa maong Magbalantay ug ila Siyang ginasonod.

Karon kung ingon-ana, tan-awa kini, kung unsa na’y atong ginapaninguhaan ipakita kaninyo. Kining binhi sa kamatayon nga nagsugod sa nahaunang kapanahonan—kining maong binhi sa organisasyon, sa kaulahian midaku na sa pagka-kahoy kon diin nagpuyo ang matag mahugaw nga langgam. Bisan pa sa iyang mga pagpangangkon nga siya ang maghahatag sa kinabuhi, siya hinoon ang tighahatag sa kamatayon. KAMATAYON ang iyang bunga. Sila nga nagaambit kaniya patay na. Kining gamhanang sistema sa pang-kalibutan nga iglesia nga nagailad sa kalibutan nga anaa kuno kaniya ang pisikal ug espirituwal nga kaluwasan nagalimbong ug nagalaglag sa kadaghanan. Dili lamang siya ang kamatayon nga nagpakatawo, apan ang kini nga patay’g dunot na nga linalang pagapatyon mismo pinaagi sa kamatayon nga mao ang linaw nga kalayo. Oh, maila na unta sa mga tawo kung unsa ang ilang katapusan sa pagpabilin diha kaniya. “Gumula kamo gikan kaniya, kay nganong kinahanglan pa kamong mamatay?”

ANG KINATAPUSAN NGA PASIDAAN

Pinadayag 2:23. “Ug pagapatyon ko sa kamatayon ang iyang mga anak; ug ang tanang mga iglesia mahibalo nga Ako Mao Ang nagasusi sa mga sulod nga tinguha ug sa mga kasingkasing; ug pagahatagan ko ang tagsatagsa kaninyo sumala sa inyong mga buhat.”

Nagalantaw ang Dios sa kasingkasing. Wala gayud kana nausab. Dili na gayud kini mausab ni kanus-a pa. Dinhi karon, sama niadtong tanang mga kapanahonan adunay duha ka grupo, nga parehong nagapahayag sa ilang mga pinadayag gikan sa Dios ug sa ilang relasyon sa Dios. “Bisan pa niini ang malig-on nga patukoranan sa Dios

nagapabilin sa pagbarug, nga aduna kining maong selyo, *Ang Ginoo nakaila kanila nga mga Iya.*” Ikaduhang Timoteo 2:19. “Nagasaki ang Dios sa mga sulod nga tinguha.” Ang pulong ‘nagasaki’ nagkahulogan og ‘subayon’ o ‘sundan.’ Padayon nga ginasubay sa Dios ang atong mga hunahuna (mga sulod nga tinguha); nasayod Siya kung unsay anaa sa sulod sa atong mga kasingkasing. Makita Niya ang atong mga binuhatan nga maoy usa ka tinong pagpakita kung unsay anaa sa sulod kanato. Nagagikan sa kasingkasing kana kung ang nagagawas ba’y pagkamarung o kadautan man. Ang atong mga motibo, atong mga katuyoan—dayag tanan ngadto Kaniya ingon nga ginabantayan Niya ang matag lihok. Ang matag lihok, matag panulti pagadalhon ngadto sa paghukom sa dihang ihatag na ang pagkuwenta sa atong mga pagkinabuhi. Walay pagkahadlok sa Dios sa atubangan sa mini nga punoan ug magbayad sila’g mahal. Ang tanan nga nagapahayag sa Iyang Ngalan, magkinabuhi ingon nga mga balaan. Mahimong mailad nato ang mga tawo apan dili gayud nato mailad ang Dios. 🕊

Kining mensahe ni Igsoong William Marrion Branham, nga gihinganla'g *Kadtong Babaye Nga Si Jezabel*, gikuha gikan sa kapitulo nga Ang Kapanahonan Sa Iglesia Sa Tiatira sa iyang libro nga gihinganla'g *Ang Kabatbatan Sa Pito Ka Mga Kapanahunan Sa Iglesia*, ug pinatikan dinhi nga walay pagkulang ug gipang-apod-apod sa Voice of God Recordings.

CEBUANO

©2011 VGR, ALL RIGHTS RESERVED

Ang orihinal nga mga mensahe ni Igsoong William Marrion Branham girekord sa mga magnetikong teyp, nga adunay mosobra sa 1100 ang mahimong maangkon. Kadaghanan niining mga wali anaa sa pormang libro, nga gipatik nga walay pagkulang. Ang maong mga teyp, mga compact disc, mga libro, mga film, mga retrato, ug uban pang makatabang nga mga impormasyon mahitungod sa iyang ministerio sa tibuok kalibutan mahimong maangkon pinaagi sa pagsulat sa:

VOICE OF GOD RECORDINGS

P.O. Box 950, Jeffersonville, Indiana 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pangdinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org